

# Jalinan kerjasama penyelidikan UMP, UoS

**U**NIVERSITI Malaysia Pahang (UMP) akan bekerjasama dengan University of Seoul (UoS), Korea Selatan bagi membangunkan penyelidikan dalam teknologi alam sekitar seperti pemantauan kualiti air sungai.

Kerjasama itu terjalin menerusi perjanjian persefahaman antara Pusat Penyelidikan dan Pengurusan Sumber Alam (CERRM) UMP dengan Jabatan Kejuruteraan Alam Sekitar UoS, yang dimeterai baru-baru ini. Pengarah CERRM, Dr Wan Mohd Faizal Wan Ishak, berkata kerjasama

bermula dengan penggunaan perisian bagi memantau kualiti air sungai yang dibangunkan oleh Jabatan Kejuruteraan Alam Sekitar UoS.

"UMP menerusi CERRM juga akan mengadakan kerjasama akademik, pertukaran pelajar dan kakitangan serta penyelidikan bersama dan program berkembar.

"Persefahaman ini akan memberi impak yang berguna kepada kedua-

dua universiti," katanya yang mengunjungi lawatan ke Korea Selatan.

Lawatan juga disertai penyelidik UMP dan pegawai Jabatan Pengairan dan Saliran (JPS) termasuk Timbalan Pengarah CERRM, Ir Shariza Mat Aris dan Ketua Penolong Pengarah Kanan, Bahagian Pengurusan Lembangan Sungai dan Zon Pantai JPS yang juga Profesor Adjung di UMP, Dr Nasehir Khan EM Yahaya.

Presiden UoS, Prof Dr Kun Lee menyambut kedatangan rombongan itu ke universitinya.

Wan Mohd Faizal berkata, peserta lawatan berpeluang mendengar taklimat dan berkongsi pengalaman dengan Prof Kim Hyunook dari Jabatan Kejuruteraan Alam Sekitar UoS.

Selain itu, katanya, mereka

melawat Stesen LOC di Empangan Paldang Korea Selatan yang menempatkan tangki yang dibina di bawah tanah bagi menyimpan sisa kumbahan dari kawasan ternakan berhampiran.

Wan Mohd Faizal berkata, peralatan menyukat kualiti air kumbahan yang digunakan di stesen itu akan dibawa ke UMP sebagai bahan kajian dan penyelidikan bersama.

Peserta juga melawat IPO Weir dan Yeoju Weir, iaitu dua daripada empat sungai dalam Projek '4-River' Korea Selatan yang boleh menjadi penanda aras bagi pemuliharaan sungai di Malaysia pada masa akan datang.



DR WAN MOHD FAIZAL (tiga dari kanan) bersama delegasi UMP bergambar di Stesen IPO Weir semasa kunjungan ke UoS, baru-baru ini.